



**REPUBLIKA E SHQIPËRISË
AVOKATI I POPULLIT**

Adresa: Bulevardi: "Zhan D'Ark" Nr.2
Tiranë, Shqipëri

Tel/Fax: +355 4 2380 300/315
E-mail: ap@avokatipopullit.gov.al
www.avokatipopullit.gov.al

RAPORT MONITORIMI

**MBI PROCEDURËN E HEDHJES SË SHORTIT
PËR ZGJEDHJEN E ANËTARËVE TË
KËSHILLIT TË EMËRIMEVE NË DREJTËSI 2026**

ZHVILLUAR NGA PRESIDENTI I REPUBLIKËS NË DATËN 03.12.2025

Tiranë, 10 Dhjetor 2025

Hyrje

Avokati i Popullit, si institucion i pavarur, i parashikuar në Kushtetutë, për mbrojtjen, parandalimin e shkeljes dhe promovimin e të drejtave dhe lirive të ligjshme të individëve, e ka vlerësuar Reformën në Drejtësi, si reformën më të rëndësishme për ecurinë dhe zhvillimin e sistemit demokratik në Shqipëri. Kjo reformë ka një fokus të veçantë në punën e institucionit të Avokatit të Popullit, jo vetëm për shkak të detyrimeve ligjore të përcaktuara në legjislacionin në fuqi, por edhe për shkak të vetë rëndësisë që mbart kjo reformë, e lidhur drejtëpërdrejtë me mbrojtjen dhe respektimin e të drejtave të njeriut në vend.

Në ushtrim të mandatit dhe detyrave bazë që i janë dhënë nga Kushtetuta dhe ligjet e tjera në fuqi, Avokatit të Popullit i janë dhënë kompetenca mjaft të rëndësishme për monitorimin e zbatimit të Reformës në Drejtësi. Duke qenë se Avokati i Popullit e konsideron si jetësore për të gjithë shoqërinë shqiptare kthimin e besimit në sistemin e drejtësisë në vend, ka dhënë dhe vazhdon të japë kontributin e tij në shumë prej proceseve, të nevojshme për t'u realizuar. Një vend të rëndësishëm në këto procese zë roli kushtetues i Avokatit të Popullit, në vëzhgimin aktiv dhe proaktiv të veprimtarisë së institucioneve që zhvillojnë procedurat e zgjedhjes së anëtarëve të Këshillit të Emërimeve në Drejtësi (më poshtë KED), si dhe monitorimi i vazhdueshëm i veprimtarisë së këtij institucioni, në të gjithë aktivitetin e tij. Ky rol përbën një garanci të shtuar, për transparencën dhe rritjen e besueshmërisë së KED, si një prej organeve të krijuara për funksionimin dhe qeverisjen e sistemit të drejtësisë.

Nën përgjegjësinë e lartë të këtij angazhimi institucional, vlerësojmë se pjesëmarrja dhe monitorimi i procesit të hedhjes së shortit për zgjedhjen e anëtarëve të KED dhe për më tepër vlerësimi i raporteve të monitorimit të përgatitura nga ana e Avokatit të Popullit, duhet të konsiderohen si pjesë e sistemit “*check and balance*” dhe të trajtohen problematikat, kur është rasti, në kuadër të veprimtarisë së organeve që kanë përgjegjësinë dhe detyrimin e mbarëvajtjes së procesit të hedhjes së shortit, për anëtarë të Këshillit të Emërimeve në Drejtësi.

Në vlerësimin e Avokatit të Popullit, funksionimi i sistemit të drejtësisë vazhdon të përballet me disa vështirësi, një prej të cilave është volumi i madh i punës. Kjo pasi Reforma në Drejtësi solli largimin e një numri të konsiderueshëm gjyqtarësh dhe prokurorësh dhe moszëvendësimi i tyre me shpjetësinë e nevojshme, ka sjellë kohëzgjatjen përtej afateve të arsyeshme të proceseve.

Në vijim, po paraqesim raportin e monitorimit për procedurën e hedhjes së shortit për zgjedhjen e anëtarëve të Këshillit të Emërimeve në Drejtësi, që do të ushtrojë veprimtarinë gjatë vitit 2026, të zhvilluar në datën 03.12.2025, në institucionin e Presidentit të Republikës së Shqipërisë.

1. Kompetenca e Avokatit të Popullit, për monitorimin e procedurës së shortit, për zgjedhjen e anëtarëve të Këshillit të Emërimeve në Drejtësi.

Lidhur me procedurën e hedhjes së shortit për zgjedhjen e anëtarëve të KED, Kushtetuta e Republikës së Shqipërisë, parashikon në pikën 3, të nenit 149/d dhe pikën 11, të nenit 179 (dispozitat kalimtare dhe të fundit), ndër të tjera se: “*Presidenti i Republikës përzgjedh me short, midis datave 1 dhe 5 Dhjetor të çdo viti kalendarik, anëtarët e Këshillit të Emërimeve në Drejtësi*

(KED)¹ ... Nëse Presidenti i Republikës nuk arrin të zgjedhë anëtarët deri në datën 5 Dhjetor, Kryetari i Kuvendit i zgjedh ata me short brenda datës 10 Dhjetor të atij viti kalendarik. Avokati i Popullit merr pjesë si vëzhgues në procedurën e hedhjes së shortit, si dhe në mbledhjet dhe veprimtarinë e Këshillit të Emërimeve në Drejtësi”.

“Avokati i Popullit merr pjesë si vëzhgues në procedurën e shortit, si dhe në mbledhjet dhe veprimtarinë e Këshillit të Emërimeve në Drejtësi”.

Po kështu, në pikën 6, të nenit 284, të ligjit nr.115/2016 “Për Organet e Qeverisjes së Sistemit të Drejtësisë”, parashikohet se: “Presidenti i Republikës organizon shortin për zgjedhjen e anëtarëve të Këshillit të Përkohshëm të Emërimeve në Drejtësi pa vonesë. Procedurat e shortit dokumentohen nga Presidenti i Republikës. Procedurat e shortit zhvillohen në prani të Avokatit të Popullit, i cili harton dhe bën publik një raport monitorimi mbi procedurën e shortit”.

Objekti i veprimtarisë së KED, si një prej organeve shtetërore më të rëndësishme për qeverisjen e sistemit të drejtësisë, në përputhje me nenin 149/d, të Kushtetutës së Republikës së Shqipërisë, lidhet me verifikimin e kushteve ligjore dhe vlerësimin e kriterëve profesionale e morale të kandidatëve për Inspektor të Lartë të Drejtësisë, si dhe të kandidatëve për anëtarë të Gjykatës Kushtetuese. KED-ja me cilësinë e një organi kolegjal, përbëhet nga 9 anëtarë të përzgjedhur me short, nga radhët e gjyqtarëve dhe prokurorëve, të cilët plotësojnë kriteret ligjore të përcaktuara në nenin 221/1, të ligjit nr.115/2016 “Për organet e qeverisjes së sistemit të drejtësisë”. Ata ushtrojnë detyrën me një mandat një vjeçar, që fillon në datën 1 Janar, të çdo viti kalendarik.

Përbërja e KED përcaktohet në nenin 220, të ligjit nr.115/2016 “Për organet e qeverisjes së sistemit të drejtësisë”, si vijon:

- 2 (dy) gjyqtarë të Gjykatës Kushtetuese,
- 1 (një) gjyqtar i Gjykatës së Lartë,
- 1 (një) prokuror nga Prokuroria e Përgjithshme,
- 2 (dy) gjyqtarë nga Gjykatat e Apelit,
- 2 (dy) prokurorë nga zyrat e prokurorisë, pranë Gjykatave të Apelit,
- 1 (një) gjyqtar nga Gjykatat Administrative.

¹ Sipas nenit 149/d, pika 1, të Kushtetutës përcaktohet se: “Këshilli i Emërimeve në Drejtësi kryen verifikimin e kushteve ligjore dhe vlerësimin e kriterëve profesionale e morale të kandidatëve për Inspektor të Lartë të Drejtësisë, si dhe të kandidatëve për anëtarë të Gjykatës Kushtetuese. Këshilli i Emërimeve në Drejtësi shqyrton dhe rendit kandidatët sipas meritës profesionale. Renditja e kandidatëve nuk është e detyrueshme, me përjashtim të rastit kur nuk arrihet të emërohet kandidati”.

Sipas pikës 3, të nenit 220, dhe sipas pikës 7, të nenit 221, po të të njëjtit ligj, krahas anëtarëve të KED, zgjidhen edhe anëtarët zëvendësues të tyre, që zëvendësojnë të parët, në rast pamundësie ushtrimi të funksionit, ose në rast të konfliktit të interesit.

Presidenti i Republikës në ushtrim të kompetencës së tij, parësore kushtetuese dhe ligjore, për zhvillimin e procesit të hedhjes së shortit për zgjedhjen e anëtarëve të Këshillit të Emërimeve në Drejtësi, midis datave 1 dhe 5 Dhjetor të çdo viti kalendarik, në respektim të afatit përcaktues kohor zhvilloi këtë proces, në datën 03.12.2025.

Më konkretisht Presidenti i Republikës së Shqipërisë, në përputhje me nenin 149/d, pika 3, të Kushtetutës së Republikës së Shqipërisë, si dhe të ligjit nr.115/2016 *“Për organet e qeverisjes së sistemit të drejtësisë”*, ka nxjerrë Vendimin nr. 10, datë 18.11.2025 *“Për caktimin e datës për organizimin e procedurës për hedhjen e shortit, nga Presidenti i Republikës, për zgjedhjen e anëtarëve të Këshillit të Emërimeve në Drejtësi, që do të funksionojë përgjatë vitit 2026”*, duke caktuar zhvillimin e procedurës së hedhjes së shortit për zgjedhjen e anëtarëve të Këshillit të Emërimeve në Drejtësi, në datën 3 dhjetor 2025, ora 10.00, në institucionin e Presidentit të Republikës së Shqipërisë.

Sipas pikës 3 të këtij Vendimi, ngarkohej Sekretari i Përgjithshëm i Institucionit të Presidentit të Republikës për ngritjen menjëherë të Sekretariatit Teknik për organizimin e procedurës për përzgjedhjen me short të anëtarëve të Këshillit të Emërimeve në Drejtësi, si edhe ndjekjen e procedurave të përcaktuara në Rregulloren *“Për përcaktimin e procedurës dhe rregullave të hedhjes së shortit për zgjedhjen e anëtarëve të Këshillit të Emërimeve në Drejtësi”*.

Në zbatim të detyrimit të mësipërm Sekretari i Përgjithshëm i institucionit të Presidencës, po në datë 18.11.2025 ka nxjerrë Urdhërin nr. 109, *“Për ngritjen e sekretariatit teknik për organizimin e procedurave të hedhjes së shortit për zgjedhjen e anëtarëve të Këshillit të Emërimeve në Drejtësi”*.

Vendimi i sipërcituar dhe dokumentet e tjerë zyrtarë, të nevojshëm për realizimin e procesit të hedhjes së shortit për zgjedhjen e anëtarëve të Këshillit të Emërimeve në Drejtësi, që do të funksionojë përgjatë vitit 2026, janë bërë publike, në njoftimin zyrtar të publikuar në faqen zyrtare të internetit të institucionit të Presidentit të Republikës, në rubrikën *“Hedhja e shortit për KED – Shorti për KED 2026”*.²

Në respektim të parimit të transparencës për realizimin e procesit, vlerësojmë se këto njoftime publike të kryera nga ana e Presidentit të Republikës, i kanë shërbyer këtij qëllimi, duke kontribuar gjithashtu në garantimin e ligjshmërisë, seriozitetit dhe besimit të publikut në këtë proces.

² <https://president.al/hedhja-e-shortit-per-ked/shorti-per-ked-2026/>

Në rubrikën e mësipërme të faqes zyrtare të internetit të institucionit të Presidentit të Republikës, janë publikuar gjithashtu edhe të gjitha dokumentet zyrtarë që vërtetojnë kryerjen e procedurave përkatëse ligjore, mbi bazën e të cilave është organizuar shorti, si dhe dokumentacioni i përcjellë nga institucionet e ngarkuara nga ligji nr.115/2016 *“Për organet e qeverisjes së sistemit të drejtësisë”*, për dërgimin e listave me emrat e kandidatëve, për anëtarë të KED-së.

Njoftimi zyrtar për caktimin e një përfaqësuesi për të qenë të pranishëm në momentin e organizimit të shortit i është dërguar: Kuvendit të Republikës së Shqipërisë, Këshillit të Lartë Gjyqësor, Avokatit të Popullit, Delegacionit të Bashkimit Evropian në Tiranë dhe Ambasadës së Shteteve të Bashkuara të Amerikës. Gjithashtu i është drejtuar shkresë edhe Radio Televizionit Publik Shqiptar, me qëllim transmetimin e kësaj procedure.

Procedura e hedhjes së shortit për zgjedhjen e anëtarëve të Këshillit të Emërimeve në Drejtësi, që do të funksionojë përgjatë vitit 2026, është kryer gjithashtu në përputhje edhe me: Rregulloren *“Për përcaktimin e procedurës dhe rregullave të hedhjes së shortit për zgjedhjen e anëtarëve të Këshillit të Emërimeve në Drejtësi”*, miratuar me Vendimin nr. 404, datë 25.11.2019, të Presidentit të Republikës.

Avokati i Popullit ka kompetenca të mirëpërcaktuara në këtë proces, të parashikuara shprehimisht nga Kushtetuta e Republikës së Shqipërisë, si dhe nga ligji nr. 115/2016, *“Për Organet e Qeverisjes së Sistemit të Drejtësisë”*, lidhur me Monitorimin (vëzhgimin) e procedurës së hedhjes së shortit, për përzgjedhjen e anëtarëve të KED, nga ana e Presidentit të Republikës.

Qëndrimi institucional i Avokatit të Popullit është se, parimet e transparencës, gjurmueshmërisë dhe monitorimit të procesit të përcaktuara në pikën 9, të nenit 221, të ligjit 115/2016 *“Për Organet e Qeverisjes së Sistemit të Drejtësisë”*, duhet të jenë efektive për të bërë të mundur si përcaktimin e kandidatëve të cilët do t’i nënshtrohen shortimit, ashtu edhe procedurën e shortimit të kandidatëve për t’u bërë anëtarë. Kjo do të thotë se procesi fillon dhe zhvillohet efektivisht, jo vetëm mbi bazën e njoftimeve dhe nisjes së procedurave përkatëse ligjore nga ana e Presidentit të Republikës, por ai bazohet edhe në seriozitetin dhe integritetin moral dhe profesional, të emrave të propozuar si kandidatura për anëtarë të KED-së, nga ana e institucioneve përgjegjëse që kanë këtë detyrim, me qëllim që ky proces të jetë sa më përmbajtësor dhe në përmbushje të plotë, të kriterëve të përcaktuara në ligj.

2. Përmbushja e kritereve ligjore nga kandidatët

Neni 221, pika 1, e ligjit nr.115/2016 “Për Organet e Qeverisjes së Sistemit të Drejtësisë”, përcakton përkatësisht tetë kritere ligjore, që duhet të plotësojnë kandidatët për t’u përfshirë në shortin për zgjedhjen e anëtarëve të KED-së, që do të funksionojë përgjatë vitit 2026³.

Në njoftimin zyrtar të publikuar në faqen zyrtare të internetit të institucionit të Presidentit të Republikës, nënvizohet kjo kërkesë bazike për vlefshmërinë e procesit. Ndër të tjera në këtë njoftim parashikohet shprehimisht se: “...sipas ligjit do të përfshihen në short për zgjedhjen e anëtarëve të Këshillit të Emërimeve në Drejtësi, ata magjistratë (gjyqtarë dhe prokurorë) dhe Gjyqtarë të Gjykatës Kushtetuese, të cilët, plotësojnë kushtet e parashikuara në Kushtetutë dhe në ligj”.

Në faqen zyrtare të internetit të institucionit të Presidentit të Republikës, janë publikuar dokumentet zyrtare që lidhen me këtë proces, si vijon:

- Vendim i Presidentit të Republikës nr. 10, datë 18.11.2025 për hedhjen e shortit
- Rregullore mbi organizimin e hedhjes së shortit miratuar me vendim nr. 404, datë 25.11.2019 të Presidentit të Republikës
- Autorizim i Presidentit të Republikës për moderimin e shortit për KED 2026
- Urdhër i Sekretarit të Përgjithshëm për ngritjen e Sekretariatit Teknik
- Kërkesë për bashkëpunim drejtuar institucioneve mbi dërgimin e listave
- Njoftim për caktim përfaqësuesish nga Kuvendi i Republikës së Shqipërisë në hedhjen e shortit KED 2026
- Njoftim për caktim përfaqësuesi për pjesëmarrje në organizimin e hedhjes së shortit KED 2026 drejtuar Këshillit të Lartë Gjyqësor
- Njoftim për caktim përfaqësuesi për pjesëmarrje në organizimin e hedhjes së shortit KED 2026 drejtuar Avokatit të Popullit
- Kërkesë për grup xhirimi
- Ftesë Delegacionit të Bashkimit Evropian në Tiranë, për pjesëmarrje në organizimin e hedhjes së shortit KED 2026
- Ftesë Ambasadës së Shteteve të Bashkuara të Amerikës për pjesëmarrje në organizimin e hedhjes së shortit KED 2026

³ Neni 221:

1. Mund të përfshihen në shortin për zgjedhjen e anëtarëve të Këshillit të Emërimeve në Drejtësi vetëm ata magjistratë dhe gjyqtarë të Gjykatës Kushtetuese, të cilët, në momentin e organizimit të shortit, plotësojnë kushtet e mëposhtme:

a) në kohën e hedhjes së shortit magjistrati e ka ushtruar funksionin për të paktën 10 vjet dhe anëtari i Gjykatës Kushtetuese për të paktën 1 vit;

b) nuk ka një masë disiplinore në fuqi;

c) nuk ka filluar një procedim disiplinor para kandidimit;

ç) magjistrati ka përfunduar ciklin e plotë katër ose pesëvjeçar të studimeve në drejtësi;

d) magjistrati ka përfunduar Shkollën e Magjistraturës;

dh) magjistrati është vlerësuar të paktën “shumë mirë” në 2 vlerësimet e fundit etik dhe profesional;

e) magjistrati ose gjyqtari i Gjykatës Kushtetuese nuk është nën hetim ose nuk është dënuar më parë me vendim gjyqësor të formës së prerë për kryerjen e një vepre penale;

ë) magjistrati ose gjyqtari i Gjykatës Kushtetuese nuk është dënuar më parë me sanksion administrativ për shkelje të rregullave ligjore në lidhje me deklarimin e pasurisë dhe konfliktin e interesave.

2. Kandidatët që nuk plotësojnë një nga këto kushte përjashtohen nga shorti

- Lista e kandidatëve e përcjellë nga KLGJ
- Lista e kandidatëve e përcjellë nga Gjykata Kushtetuese
- Lista e kandidatëve e përcjellë nga KLP
- Njoftim për caktim përfaqësuesi për pjesëmarrje në organizimin e hedhjes së shortit KED 2026 drejtuar Këshillit të Lartë të Prokurorisë
- Njoftim për caktim përfaqësuesi për pjesëmarrje në organizimin e hedhjes së shortit KED 2026 drejtuar Gjykatës Kushtetuese
- Caktim i përfaqësuesit të Këshillit të Lartë Gjyqësor për pjesëmarrje në hedhjen e shortit KED-2026
- Lista e përditësuar e kandidatëve e përcjellë nga Gjykata Kushtetuese
- Lista e përditësuar e kandidatëve e përcjellë nga KLP
- Lista e përditësuar e kandidatëve e përcjellë nga KLGJ
- Caktim i përfaqësuesit të Avokatit të Popullit për pjesëmarrje në hedhjen e shortit KED 2026
- Caktim i përfaqësuesve të Kuvendit për pjesëmarrje në hedhjen e shortit KED 2026
- Caktim i përfaqësuesit të Gjykatës Kushtetuese për pjesëmarrje në hedhjen e shortit KED 2026
- Shpallja e rezultatit pas hedhjes së shortit KED 2026, sot, më 3 dhjetor 2025
- Procesverbali i rezultatit të shortit KED 2026
- Caktim i përfaqësuesit të Këshillit të Lartë të Prokurorisë për pjesëmarrje në hedhjen e shortit KED 2026.

Nga korespondenca e zhvilluar ndërmjet institucionit të Presidencës, me institucionet e Këshillit të Lartë Gjyqësor (KLGJ) dhe Këshillit të Lartë të Prokurorisë (KLP), rezulton se KLGJ dhe KLP kanë kryer verifikimin paraprak të kushteve dhe kriterëve të kandidatëve, si dhe kanë publikuar në faqet zyrtare respektive të internetit, emrat e gjyqtarëve dhe prokurorëve që i plotësojnë kushtet ligjore për të qenë kandidatë dhe atyre që nuk i plotësojnë. Gjithashtu KLGJ në shkresën e saj, informonte se pas komunikimit me Gjykatën Administrative të Apelit, rezulton se nuk ka ushtruar të drejtën e ankimit asnjë prej gjyqtarëve për kundërshtimin e vendimit të KLGJ-së, për përjashtimin nga lista e kandidatëve për shortin për anëtarë të KED-së. Po kështu KLGJ në kuadër të përditësimit të të dhënave të dërguara më parë, informon institucionin e Presidentit se, citojmë: «...në datë 25.11.2025 ka bërë betimin përpara Presidentit të Republikës së Shqipërisë, magistrati (gjyqtar) z. Asim Vokshi, i cili është zgjedhur gjyqtar i Gjykatës Kushtetuese me Vendimin nr. 2, datë 30.9.2025 nga Mbledhja e Posaçme e Gjyqtarëve të Gjykatës së Lartë. Kështu, duke qenë se z. Vokshi ka qenë në listën e magistratëve (gjyqtarë) që plotësojnë kushtet për t'u përfshirë në shortin për zgjedhjen e anëtarëve të Këshillit të Emërimeve në Drejtësi, për vitin kalendarik 2026, nga radhët e magistratëve (gjyqtarë) të Gjykatës së Lartë, kërkojmë përditësimin e kësaj liste, duke e hequr z. Vokshi, nga lista e dërguar më parë nga ana jonë».

3. Monitorimi i hedhjes së shortit

Procesi i hedhjes së shortit për anëtarë të KED, filloi në orën 10.00, të datës 03 Dhjetor 2025, në institucionin e Presidentit të Republikës së Shqipërisë, salla “Skënderbej”. Në këtë sallë janë paraqitur dhe kanë qenë prezent gjatë gjithë zhvillimit të procedurës të hedhjes së shortit, përfaqësues nga institucione shtetërore si vijon: Kuvendi i Shqipërisë, Avokati i Popullit, Gjykata Kushtetuese, Këshilli i Lartë Gjyqësor dhe Këshilli i Lartë i Prokurorisë. Po kështu ishin të

pranishëm edhe përfaqësues të institucioneve ndërkombëtare që kanë asistuar dhe ndjekur si Reformën në Drejtësi, ashtu edhe punën e Këshillit të Emërimeve në Drejtësi: më konkretisht përfaqësues nga Delegacioni i Bashkimit Evropian në Tiranë, si dhe Ambasada Amerikane në Tiranë (këshilltarja ligjore rezidente pranë misionit OPDAT). Prezent në ambientin ku zhvillohej shorti, ka qenë edhe Presidenti i Republikës së Shqipërisë, z. Bajram Begaj, i cili ka qëndruar gjatë gjithë zhvillimit të këtij procesi.

Në përputhje me parashikimet e Rregullores *“Për përcaktimin e procedurës dhe rregullave të hedhjes së shortit për zgjedhjen e anëtarëve të Këshillit të Emërimeve në Drejtësi”*, Presidenti i Republikës kishte ngarkuar zj. Erjola Shia Drejtore e Shërbimeve Juridike në Institucionin e Presidencës, për moderimin e procedurës së hedhjes së shortit për zgjedhjen e anëtarëve të Këshillit të Emërimeve në Drejtësi, ndërsa, nj. Bianka Hada, Drejtor, Drejtoria TIK, pjesë e Sekretariatit Teknik, si person i autorizuar për tërheqjen rastësore të goglave për përzgjedhjen e anëtarëve të Këshillit të Emërimeve në Drejtësi⁴.

Zj. Erjola Shia, fillimisht bëri një prezantim të shkurtër të rëndësisë së KED-së, procedurave të krijimit të saj, përbërjes, kompetencave që i jepen nga Kushtetuta dhe nga legjislacioni në fuqi, kriteret ligjore që duhet të përmbushë çdo kandidat deri në momentin e hedhjes së shortit, për t’u përfshirë në këtë të fundit, si dhe procedurat e ndjekura nga institucioni i Presidencës (korespondenca me institucionet e tjera), për verifikimin e plotësimit të kriterëve të kandidatëve, si dhe për tëftuar përfaqësuesit e institucioneve të tjera në procedurën e shortit.

Për hedhjen e shortit, mbi bazën e përcaktimit të nenit 3, të Vendimit nr. 10, datë 18.11.2025 “Për caktimin e datës për organizimin e procedurës për hedhjen e shortit, nga Presidenti i Republikës, për zgjedhjen e anëtarëve të Këshillit të Emërimeve në Drejtësi, që do të funksionojë përgjatë vitit 2026”, Sekretari i Përgjithshëm i institucionit të Presidentit të Republikës, kishte nxjerrë Urdhërin nr. 109 datë 18.11.2025, “Për ngritjen e sekretariatit teknik për organizimin e procedurave të hedhjes së shortit për zgjedhjen e anëtarëve të Këshillit të Emërimeve në Drejtësi”, duke caktuar në përbërje të Sekretariat 4 (katër) nëpunësve të këtij institucioni dhe 2 (dy) anëtarë zevendësues.

Për hedhjen e shortit ishin përgatitur disa enë qelqi transparente, ku ishin të vendosura goglat, të baqrabarta me numrin e kandidaturave të dërguara në shkresat përkatëse të institucioneve shtetërore propozuese. Gjithashtu ishte përgatitur një kuti transparente me mekanizëm rrotullues (e cila fillimisht ishte bosh), ku do të vendoseshin goglat, (të cilat sipas Rregullores së sipërcituar, nuk ishin të tejdukshme), në të cilat do të futeshin shiritat e letrës ku ishin shënuar emrat e kandidatëve të propozuar nga secili institucion, sipas listës përkatëse të përcjellë Presidentit të Republikës së Shqipërisë, prej tyre.

Për verifikimin fizik të goglave plastike me të cilat do të hidhej shorti për zgjedhjen e anëtarëve të KED 2026, si dhe mjeteve të tjera (enët e qelqi ku ndodheshin goglat plastike, enët e qelqit ku do futeshin goglat me emrat e kandidatëve), moderatorja ftoi përfaqësuesin e Avokatit të Popullit z. Besnik Deda, Komisioner, i cili pasi kreu kontrollin përkatës, deklaroi publikisht se gjithçka ishte në rregull.

⁴ Autorizim Nr.3824/2 Prot., datë 18.11.2025 i Presidentit të Republikës.

Fillimisht shiritat e letrës me emrat e kandidatëve sipas institucioneve përkatëse që merrnin pjesë në short, ishin vendosur në një kuti transparente të veçantë. Procesi teknik i hedhjes së shortit u krye nga dy pjesëtare të Sekretarisë Teknike, të cilët kryenin pikërisht veprimet teknike të sipërcituara.

Shiritat e letrës me emrat e kandidatëve pasi u lexuan publikisht, edhe në praninë e mediave, u futën në gogla dhe rradha e hedhjes së shortit u përcaktua duke u mbështetur në renditjen e mëposhtme:

- Kandidatë nga Gjykata Kushtetuese
- Kandidatë nga Gjykata e Lartë;
- Kandidatë nga Prokuroria e Përgjithshme.
- Kandidatë nga Gjykatat e Apelit;
- Kandidatë nga Zyrat e Prokurorisë, pranë Gjykatave të Apelit;
- Kandidatë nga Gjykatat Administrative.

- *Procedura e zhvillimit të shortit për përzgjedhjen e kandidatëve nga Gjykata Kushtetuese* u zhvillua ndërmjet emrave të gjyqtarëve të kësaj Gjykate, të konfirmuar në listën nominale, të dërguar nga Gjykata Kushtetuese, drejtuar Presidentit të Republikës. Lidhur me procedurën për përzgjedhjen e kandidatëve nga Gjykata e Kushtetuese, punonjësja e Sekretarisë Teknike të institucionit të Presidentit të Republikës, bëri përzierjen e goglave dhe Presidenti i Republikës, ftoi përfaqësuesin e Avokatit të Popullit z. Besnik Deda, i cili tërhoqi goglën përkatëse, nxorri shiritin e letrës që gjendej brenda goglës së përzgjedhur, lexoi me zë të lartë emrin e kandidatit për të gjithë pjesëmarrësit në sallë dhe më pas ja dorëzoi shiritin e letrës Sekretariatit Teknik. Kandidati, i përzgjedhur në këto kushte merr cilësinë e anëtarit të Këshillit të Emërimeve në Drejtësi.

Pas zhvillimit të shortit ndërmjet gjyqtarëve, që plotësonin kushtet ligjore për t'u përfshirë në short, rezultoi se u përzgjedhën anëtarë të KED-së, përkatësisht:

- **Zj. Fiona Papajorgji** (anëtar)
- **Zj. Marjana Semini** (anëtar)

Me të njëjtën procedurë shorti, u zgjodh edhe anëtari zëvendësues i anëtarëve të KED-së, nga gjyqtarët e Gjykatës Kushtetuese dhe më konkretisht: **z. Gent Ibrahim** (anëtar zëvendësues).

- *Procedura e zhvillimit të shortit për përzgjedhjen e kandidatëve nga Gjykata e Lartë* u zhvillua ndërmjet emrave të gjyqtarëve të kësaj gjykate, të konfirmuar në listën nominale, të dërguar me nga KLGJ-së, drejtuar Presidentit të Republikës. Lidhur me procedurën për përzgjedhjen e kandidatëve, nëpunësja e Sekretarisë Teknike të institucionit të Presidentit të Republikës, bëri përzierjen e goglave dhe pas tërheqjes në mënyrë rastësore të goglës përkatëse, u nxorr shiriti i letrës që gjendej brenda goglës së përzgjedhur, u lexua me zë të lartë emri i kandidatit për

pjesëmarrësit në sallë dhe më pas shiriti i letrës ju dorëzua Sekretariatit Teknik. Kandidati, i përzgjedhur në këto kushte merr cilësinë e anëtarit të Këshillit të Emërimeve në Drejtësi.

Pas zhvillimit të shortit ndërmjet gjyqtarëve, që plotësonin kushtet ligjore për t'u përfshirë në short, rezultoi se u përzgjedh anëtar i KED-së, përkatësisht:

- **Z. Ilir Panda (kryetar)**

Me të njëjtën procedurë shorti, u zgjodh edhe anëtari zëvendësues i anëtarëve të KED-së, nga gjyqtarët e Gjykatës së Lartë, dhe më konkretisht: **Z. Ilir Çekrezi (anëtar zëvendësues)**.

- Procedura e zhvillimit të shortit për përzgjedhjen e kandidatëve nga prokurorët e Prokurorisë së Përgjithshme u zhvillua ndërmjet emrave të prokurorëve të kësaj Prokurorie, të konfirmuar në listën nominale të konfirmuar në listën nominale, të dërguar nga institucioni i KLP-së, drejtuar Presidentit të Republikës. Lidhur me procedurën për përzgjedhjen e kandidatëve, nëpunësja e Sekretarisë Teknike të institucionit të Presidentit të Republikës, bëri përzierjen e goglave dhe pas tërheqjes në mënyrë rastësore të goglës përkatëse, u nxorr shiriti i letrës që gjendej brenda goglës së përzgjedhur, u lexua me zë të lartë emri i kandidatit për pjesëmarrësit në sallë dhe më pas shiriti i letrës ju dorëzua Sekretariatit Teknik. Kandidati, i përzgjedhur në këto kushte merr cilësinë e anëtarit të Këshillit të Emërimeve në Drejtësi.

Pas zhvillimit të shortit ndërmjet emrave të prokurorëve që plotësonin kushtet ligjore për t'u përfshirë në short, rezultoi se u përzgjedh anëtar i KED-së: **Z. Alfred Progonati (anëtar)**.

Me të njëjtën procedurë shorti, u zgjodh edhe anëtari zëvendësues i anëtarëve të KED-së, prokurorë të Prokurorisë së Përgjithshme, dhe më konkretisht: **Znj. Anila Leka (anëtar zëvendësues)**.

- Procedura e hedhjes së shortit për përzgjedhjen e kandidatëve nga Gjykatat e Apelit u zhvillua ndërmjet emrave të gjyqtarëve të këtyre gjykatave, të konfirmuar në listën nominale, të dërguar nga KLGJ, drejtuar Presidentit të Republikës. Lidhur me procedurën për përzgjedhjen e kandidatëve, nëpunësja e Sekretarisë Teknike të institucionit të Presidentit të Republikës, bëri përzierjen e goglave dhe pas tërheqjes në mënyrë rastësore të goglës përkatëse, u nxorr shiriti i letrës që gjendej brenda goglës së përzgjedhur, u lexua me zë të lartë emri i kandidatit për pjesëmarrësit në sallë dhe më pas shiriti i letrës ju dorëzua Sekretariatit Teknik. Kandidati, i përzgjedhur në këto kushte merr cilësinë e anëtarit të Këshillit të Emërimeve në Drejtësi.

Pas zhvillimit të shortit ndërmjet gjyqtarëve që plotësonin kushtet ligjore për t'u përfshirë në short, rezultoi se u përzgjedhën anëtar të KED-së:

- **Znj. Ornela Naqellari (anëtar)**
- **Znj. Ilirjana Olldashi (anëtar)**

Me të njëjtën procedurë shorti u zgjodh edhe anëtari zëvendësues i anëtarëve të KED-së, gjyqtarë të Gjykatave të Apelit, dhe më konkretisht;

- **Znj. Selvie Gjoçaj (anëtar zëvendësues)**

- *Procedura e hedhjes së shortit për përzgjedhjen e kandidatëve nga Zyrat e Prokurorive pranë Gjykatave të Apelit*, u zhvillua ndërmjet emrave të prokurorëve, të konfirmuar në listën nominale, të përcjellë nga ana e institucionit të KLP-së, drejtuar Presidentit të Republikës. Lidhur me procedurën për përzgjedhjen e kandidatëve, nëpunësja e Sekretarisë Teknike të institucionit të Presidentit të Republikës, bëri përzierjen e goglave dhe pas tërheqjes në mënyrë rastësore të gogllës përkatëse, u nxorr shiriti i letrës që gjendej brenda gogllës së përzgjedhur, u lexua me zë të lartë emri i kandidatit për pjesëmarrësit në sallë dhe më pas shiriti i letrës ju dorëzua Sekretariatit Teknik. Kandidati, i përzgjedhur në këto kushte merr cilësinë e anëtarit të Këshillit të Emërimeve në Drejtësi.

Pas zhvillimit të shortit ndërmjet emrave të prokurorëve që plotësonin kushtet ligjore për t'u përfshirë në short, rezultoi se u përzgjodh anëtar i KED-së:

- **Z. Altin Binaj (anëtar)**
- **Zj. Afërdita Ndoi (anëtar)**

Me të njëjtën procedurë shorti, u zgjodh edhe anëtari zëvendësues i anëtarëve të KED-së, prokuror në Zyrat e Prokurorive pranë Gjykatave të Apelit, dhe më konkretisht: **Z. Arben Qosja (anëtar zëvendësues)**.

- *Procedura e hedhjes së shortit për përzgjedhjen e kandidatëve nga Gjykatat Administrative* u zhvillua ndërmjet emrave të gjyqtarëve, të konfirmuar në listën nominale, të dërguar nga KLGJ Presidentit të Republikës. Lidhur me procedurën për përzgjedhjen e kandidatëve, nëpunësja e Sekretarisë Teknike të institucionit të Presidentit të Republikës, bëri përzierjen e goglave dhe pas tërheqjes në mënyrë rastësore të gogllës përkatëse, u nxorr shiriti i letrës që gjendej brenda gogllës së përzgjedhur, u lexua me zë të lartë emri i kandidatit për pjesëmarrësit në sallë dhe më pas shiriti i letrës ju dorëzua Sekretariatit Teknik. Kandidati, i përzgjedhur në këto kushte merr cilësinë e anëtarit të Këshillit të Emërimeve në Drejtësi.

Pas zhvillimit të shortit ndërmjet emrave të gjyqtarëve që plotësonin kushtet ligjore për t'u përfshirë në short, rezultoi se u përzgjodh anëtar i KED-së: **Z. Klodiana Veizi (anëtar)**.

Me të njëjtën procedurë shorti, u zgjodh edhe anëtari zëvendësues i anëtarëve të KED-së, gjyqtar në Gjykatat Administrative, dhe më konkretisht; **Z. Bezart Kaçkini (anëtar zëvendësues)**.

Sipas përkatësisë së hedhjes së shortit referuar institucionit nga vinin kandidatët garues, për audiencën që ndiqte këtë procedurë shfaqej paraprakisht në një ekran të madh elektronik, lista e

kandidatëve të propozuar që plotësonin kushtet ligjore për t'u përfshirë në shortin për zgjedhjen e anëtarëve të KED.

Në përfundim të këtij procesi, u përzgjedhën 9 anëtarë të KED, dhe 6 anëtarë zëvendësues. Sekretaria teknike, përpiloi në prezencë të të gjithë të pranishmëve në sallë procesverbalin përkatës, i cili u firmos po në prezencë të të pranishmëve nga Presidenti i Republikës.

Në përfundim të hedhjes së shortit, u shpallën emrat e anëtarëve të KED 2026, të përzgjedhur nga shorti, si dhe emrat e anëtarëve zëvendësues, si vijon:

- **Këshilli i Emërimeve në Drejtësi për vitin 2026:**

- | | | |
|---------------------------|--|-----------|
| 1. Z. Ilir Panda | nga Gjykata e Lartë | - Kryetar |
| 2. Znj. Fiona Papajorgji | nga Gjykata Kushtetuese | - Anëtar |
| 3. Znj. Marjana Semini | nga Gjykata Kushtetuese | - Anëtar |
| 4. Z. Alfred Progonati | nga Prokuroria e Përgjithshme | - Anëtar |
| 5. Znj. Ornela Naqellari | nga Gjykatat e Apelit | - Anëtar |
| 6. Znj. Iliriana Olldashi | nga Gjykatat e Apelit | - Anëtar |
| 7. Z. Altin Binaj | nga Zyra e Prokurorive pranë Gjykatave të Apelit | - Anëtar |
| 8. Zj. Aferdita Ndoi | nga Zyra e Prokurorive pranë Gjykatave të Apelit | - Anëtar |
| 9. Zj. Klodiana Veizi | nga Gjykatat Administrative | - Anëtar |

- **Anëtarët zëvendësues të Këshillit të Emërimeve në Drejtësi:**

- | | |
|-----------------------|---|
| 1. Z. Gent Ibrahim | nga Gjykata Kushtetuese |
| 2. Z. Valbon Cekrezi | nga Gjykata e Lartë |
| 3. Zj. Anila Leka | nga Prokuroria e Përgjithshme |
| 4. Znj. Selvie Gjocaj | nga Gjykata e Apelit |
| 5. Z. Arben Qosja | nga Zyrat e Prokurorive pranë Gjykatave të Apelit |
| 6. Z. Bezart Kaçkini | nga Gjykatat Administrative. |

Në përputhje me pikën 6, të nenit 284, të ligjit nr.115/2016, “Për Organet e Qeverisjes së Sistemit të Drejtësisë”, në faqen zyrtare të internetit të institucionit të Presidentit të Republikës, menjëherë pas përfundimit të procesit të hedhjes së shortit, u publikuan :

1. Shpallja e rezultatit të shortit për zgjedhjen e anëtarëve të Këshillit të Emërimeve në Drejtësi, për vitin 2026 (nënshkruar nga Presidenti i Republikës)
2. Procesverbali për hedhjen e shortit për zgjedhjen e anëtarëve të Këshillit të Emërimeve në Drejtësi, për vitin 2026.

Hedhja e shortit u transmetua direkt nga ana e Televizionit Publik Shqiptar, i cili ishte ftuar zyrtarisht me shkresë nga institucioni i Presidencës, ndërkohë që nuk kishte media të tjera dhe as përfaqësues të tyre, por sinjali i transmetimit ju ishte lejuar edhe atyre, ndaj siç u informuam më pas, edhe disa televizione të tjera e kishin transmetuar direkt këtë procedurë.

Procedura e hedhjes së shortit filloi në orën 10:00 dhe përfundoi në orën 10:50, datë 03.12.2025.

**PËRFAQËSUESI I
AVOKATIT TË POPULLIT**

KOMISIONER

Besnik DEDA



AVOKATI I POPULLIT

Erinda BALLANCA

